



## REVIZIJA UČINKA: SIGURNOST PROIZVODA I INTEGRACIJE U TRŽIŠTE EU

### CILJ REVIZIJE

Cilj revizije je utvrditi da li su institucije BiH efikasne u usklađivanju propisa iz oblasti sigurnosti proizvoda sa propisima EU.

### SVRHA REVIZIJE

Svrha revizije je potaknuti promjene koje će doprinijeti sigurnijim i kvalitetnijim proizvodima za domaće potrošače i boljim uslovima za izvoznike.

### ZAKLJUČCI

Propisi o sigurnosti proizvoda ne donose se u predviđenim rokovima, a BiH značajno zaostaje za zemljama u okruženju kada je u pitanju usklađivanje propisa o sigurnosti proizvoda sa propisima EU.

Nakon početnog napretka u usklađivanju tehničkih propisa sa EU, kada je BiH bila vodeća u regiji, zbog zastoja u radu Komiteta za izradu tehničkih propisa BiH, došlo je do zastoja u usvajanju propisa usaglašenih sa propisima EU, zastoja koji je BiH osigurao mjesto u začelju kada je u pitanju uspostava sistema sigurnosti proizvoda i integracija u zajedničko tržište EU.

Neusaglašenost propisa o sigurnosti proizvoda sa propisima EU ostavlja značajne posljedice po građane i ekonomiju u BiH. Zbog nižih zahtjeva za sigurnost proizvoda i neizgrađene infrastrukture kvalitete u BiH, otvorena je mogućnost da se proizvodi lošijeg kvaliteta plasiraju na tržište BiH, ugrožavajući zdravlje i živote potrošača. S druge strane, proizvođačima, a naročito onim koji su izvozno orijentirani, otežan je postupak dokazivanja usklađenosti proizvoda sa zahtjevima EU i plasman proizvoda na tržište EU.

Zbog nepostojanja tehničkih propisa BiH usaglašenih sa propisima EU, nisu stvorene sve pretpostavke za izgradnju institucija infrastrukture kvaliteta. Usvajanjem usaglašenih propisa o sigurnosti proizvoda povećala bi se potražnja za provjerom njihove ispunjenosti i potakao bi se razvoj akreditovanih tijela (laboratorija) za ocjenu usklađenosti proizvoda u BiH.

Nadležne institucije BiH nisu preduzele aktivnosti koje bi osigurale nastavak aktivnosti usaglašavanja tehničkih propisa o sigurnosti industrijskih proizvoda BiH sa propisima EU.

### PREPORUKA

Vijeće ministara treba aktualizovati pitanje zastoja u procesu usklađivanja propisa o sigurnosti proizvoda sa propisima EU i preduzeti potrebne aktivnosti koje će doprinijeti nastavku ovog procesa.